

Literarni konkurs za najbolje kratke priče o ulozi mladih u izgradnji i očuvanju mira povodom obilježavanja Međunarodnog dana ljudskih prava

Populacijski fond Ujedinjenih nacija (UNFPA), Britanska ambasada u Bosni i Hercegovini, Infocentar Haškog tribunala i Grad Sarajevo raspisuju literarni konkurs za najbolje kratke priče o ulozi mladih u izgradnji i očuvanju mira povodom obilježavanja Međunarodnog dana ljudskih prava.

Osnov za raspisivanje konkursa:

Iduće godine Bosna i Hercegovina (BiH) obilježava 25 godina od Dejtonskog mirovnog sporazuma - četvrt vijeka izgradnje mira, obnove i suočavanja sa nasljeđem ratne traume.

Tokom tih 25 godina su se rodile i odrasle nove generacije mladih ljudi koje su svoj narativ o skorašnjoj prošlosti gradile na osnovu informacija o ratu dobijenih iz opšteg političkog diskursa, medija, obrazovnog sistema i okruženja u kojima žive. Ti narativi su često bivali različiti, oprečni, produbljujući podjele i insistirajući na veličanju bola i patnje.

Bol i trauma koji su proizvod proteklog rata nikako nisu nestali prostim prolaskom vremena. Postoje jasne naznake da se desio međugeneracijski transfer traume i bola - prostije rečeno, vidimo da se bol i trauma starijih naraštaja prenosi na djecu koja su rođena nakon rata i koja nemaju direktna iskustva niti sjećanja na taj period.

Međutim, rješenje nije ni ignorisati niti zaboraviti prošlost - ključ leži u tome kako i na koji način transformišemo to nasljeđe bola i traume u novi smisao, u novu nadu, i novi mir.

U tom smislu želimo staviti akcent na aktivizam mladih osoba fokusiran na solidarnost - kako nositi sjećanje prošlosti na način koji nas neće iscrpiti i opteretiti? Kako izraziti spremnost da zajedno nastavimo graditi mir? Kako transformisati narativ mržnje u narativ nade? Kako se uključiti u javni diskurs i baviti se nasljeđem prošlosti i graditi budućnost na principima temeljnih demokratskih vrijednosti poput poštovanja ljudskih prava, dostojanstva, slobode i jednakosti?

Svakako, mladi nisu sami pred ovim zadatkom - naša je kolektivna obaveza da mladima olakšamo ovaj teret i da im pomognemo da nastave graditi i čuvati mir.

Kome je konkurs namijenjen?

Konkurs je namijenjen mladim osobama u BiH, uzrasta od 16 do 25 godina.

Cilj konkursa

Promovisanje pisane riječi i ujedno dati priliku mladima da sa zajednicom podijele svoja viđenja najefikasnijih načina izgradnje i očuvanja mira.

Kako učestvovati na konkursu?

- Podijelite s nama vaše kratke priče, blog postove do 1000 riječi, u kojima pišete o tome šta za vas znači mir u BiH, 25 godina nakon rata?

- Sugerišite nam na koji način da podržimo vas, mlade ljude, u nastojanjima da gradite i očuvate mir?

Literarni rad (u .doc formatu) dostavite na adresu: jajetovic@unfpa.org do 06.12.2019.godine. Uz rad je potrebno dostaviti ime i prezime, adresu stanovanja i broj telefona na koji Vas možemo kontaktirati.

Nagrade: UNFPA će dodijeliti tri nagrade a ceremonija dodjele nagrada će biti organizovana u sarajevskoj Vijećnici 10. decembra 2019. godine. Uz to, tri najbolja literarna rada biti će objavljena na web stranici Populacijskog fonda Ujedinjenih nacija: ba.unfpa.org.